每週經課朗誦經文(巴克禮台語漢字)2014/01/05

共同經課 - 1 以賽亞書六十章一節~六節

1 起來啊,發出光!因爲你的光已經到!耶和華的榮光發現,照佇你的頂面。2 看啊,黑暗欲蓋全地, 黑黑暗暗遮蓋列國,總是耶和華欲發現照你,伊的榮光欲出現佇你的身上。3 列國欲來就近你的光;君 王欲來就近你發現的大光。4 你抬目看四方;in攏聚集來你遮。你的眾子對遠遠來;你的眾查某子亦欲 互人抱來。5 彼時,你看見就有榮光;你的心大卬愕大開闊;因爲大海豐盛的財物欲轉轉來歸你;列國 的財寶亦欲來歸你。6 歸陣的駱駝,及米甸以及以法單陵的駱駝欲遍滿你的境內;示巴的眾人攏欲到; 欲帶黃金乳香來,亦欲報傳耶和華的名聲。

|共同經課 - 2 | **詩篇七十二篇一節~七節,十節~十四節**

1 〔所羅門的詩。〕上帝啊,求你將你的判斷賞賜王,將你的公義賞賜王的子。2 伊欲照公義審判你的百姓,照公平判斷你許個困苦的人。3 大山欲因爲公義互百姓平安,山仔也欲按呢。4 伊欲給百姓中困苦的人判斷,伊欲救喪鄉的人,伊欲壓碎暴虐的人。5 人欲敬畏你,日久月長,直到萬世代!6 伊欲降臨,親像雨落佇已經割的草,親像及時的雨潤澤土地。7 佇伊的日子,義人欲興旺,大大平安,及月平久。10 他施及海嶼的列王欲進貢;示巴及西巴的王欲獻禮物。11 列王攏欲仆落拜伊;萬國攏欲服事伊。12 因爲,喪鄉人求叫的時,伊欲救伊;困苦無依倚的人,伊也欲救。13 伊欲憐憫清淡喪鄉的人,伊欲 拯救喪鄉人的生命。14 伊欲救贖in的生命脫離壓迫及暴虐;伊欲看in的血做寶貝。

共同經課 - 3 以弗所書三章一節~十二節

1 因爲按呢,我——保羅爲著恁外邦人做基督耶穌的囚犯。2 恁若曾聽見上帝,爲著恁所賞賜我恩典的職份,3 就是用啓示互我知彼個奧妙,親像我已經有大略寫的。4 恁讀伊,就會曉得我知影基督的奧妙。5 是前代未曾互人知的,無親像現今佇聖神啓示伊諸個聖的使徒先知一樣。6 就是外邦人佇基督耶穌,對福音,同做後嗣,同做一個身體,相及有份佇所應允的。7 我做此個福音的差用,照上帝恩典的賞賜,就是照伊的權能所運行來賞賜我的。8 我是眾聖徒中上第一細的,得著此個恩典賞賜我,通將基督袂測度得的富有傳互外邦,9 也互眾人攏明白,此個奧妙是怎樣安排,就是歷代以來囥密佇造萬物的上帝的,10 今欲對教會互佇天裡諸個辦政事的、有權能的,知上帝百般的智慧。11 照伊佇咱的主基督耶穌所定著萬代的旨意。12 惦佇伊,咱諸個對信伊,有好膽閣嗐哉,來親近上帝。

共同經課 - 4 **馬太福音二章一節~十二節**

1 當希律王的時,耶穌已經出世佇猶太的伯利恆。有幾若個博士對東方來到耶路撒冷,講:2 「出世做猶太人的王的佇叨落?因爲阮佇東方有看見伊的星,才來欲拜伊。」3 希律王聽見,就迫腹;通耶路撒冷亦是按呢。4 就聚集眾祭司頭及百姓間的經學士,問in:「基督著佇甚麼所在出世?」5 in給伊講:「佇猶太的伯利恆。因爲先知有記載,講:6 猶太地伯利恆啊,佇猶太諸個頭人中你攏呣是第一細的;因爲欲有一個人君對你出,來照顧我的百姓以色列。」7 對按呢,希律暗靜召博士,對in詳細查彼個星出現的時,8 就差in去伯利恆,講:「恁去詳細探聽彼個嬰仔的事,尋著就來給我講,互我也通去拜伊。」9 in聽王的話就去。忽然東方所看見的星做頭導in,到嬰仔的所在,就歇佇彼頂面。10 in看見彼個星,歡喜到袂顧得;11 入厝,看見嬰仔及伊的老母馬利亞,就仆落拜嬰仔,開in的寶盒,獻禮物互伊,就是黃金、乳香、沒藥。12 閣佇眠夢中得著指點,教in呣通倒轉去就近希律,就對別條路倒去本所在。